



Broj: 01-50-1-15-29/08
Sarajevo, 4. juna 2008. godine

DOM NARODA
PARLAMENTARNE SKUPŠTINE
BOSNE I HERCEGOVINE

PREDMET: O b a v j e š t e n j e

Predstavnički dom Parlamentarne skupštine BiH održao je 29. sjednicu 14. maja i 4. juna 2008. godine. Dom je, uz ostalo, razmatrao materijale koji su u nadležnosti i Doma naroda, kako slijedi:

1. Prijedlog zakona o izmjenama i dopunama Zakona o sukobu interesa u institucijama vlasti BiH (drugo čitanje),
2. Prijedlog zakona o lijekovima i medicinskim sredstvima (drugo čitanje),
3. Prijedlog zakona o izmjenama i dopunama Zakona o jedinstvenom matičnom broju (drugo čitanje),
4. Prijedlog zakona o izmjenama i dopunama Zakona o ličnoj karti državljana BiH (drugo čitanje),
5. Prijedlog zakona o izmjenama i dopunama Zakona o prebivalištu i boravištu državljana BiH (drugo čitanje),
6. Prijedlog zakona o izmjenama i dopunama Zakona o krivičnom postupku BiH (drugo čitanje),
7. Prijedlog zakona o Fiskalnom vijeću BiH (drugo čitanje),
8. Prijedlog zakona o plaćama i naknadama u institucijama BiH (drugo čitanje),
9. Prijedlog zakona o izmjenama i dopunama Zakona o finansiranju političkih stranaka (prvo čitanje),
10. Izvještaj Zajedničke komisije oba doma o usaglašavanju teksta Zakona o izmjenama i dopunama Zakona o upotrebi i zaštiti naziva Bosne i Hercegovine,
11. Imenovanje generalnog revizora i zamjenika generalnog revizora (kandidatsku rang-listu dostavila Komisija za izbor generalnog revizora i zamjenika generalnog revizora),
12. Razmatranje izvještaja o radu za 2007. godinu zajedničkih komisija oba doma:
 - a) Zajedničke komisije za odbranu i sigurnost,
 - b) Zajedničke sigurnosno-obavještajne komisije za nadzor nad radom Obavještajno-sigurnosne agencije BiH,
 - c) Zajedničke komisije za ljudska prava, prava djeteta, mlade, imigraciju, izbjeglice, azil i etiku,
 - d) Zajedničke komisije za administrativne poslove,
 - e) Zajedničke komisije za evropske integracije,
 - f) Zajedničke komisije za ekonomske reforme i razvoj.
13. Davanje saglasnosti za ratifikaciju:
 - a) Strazburškog sporazuma o međunarodnoj klasifikaciji патената,
 - b) Evropske konvencije o nezastarijevanju zločina protiv čovječnosti i ratnih zločina,
 - c) Konvencije o zaštiti nematerijalne kulturne baštine (UNESCO).

Ad. 1.

Prijedlog zakona o izmjenama i dopunama Zakona o sukobu interesa u institucijama vlasti BiH u drugom čitanju nije dobio potrebnu većinu, pa je, prema tome, Prijedlog zakona pao.

Ad. 2.

Zakon o lijekovima i medicinskim sredstvima usvojen je sa sljedećim amandmanima:

Amandman I.

U članu 2. iza tačke 32) dodaje se nova tačka 33) koja glasi: „KONTROLNA LABORATORIJA AGENCIJE“, kao organizacioni dio Agencije za lijekove i medicinska sredstva Bosne i Hercegovine je laboratorija nadležna za ispitivanje i kontrolu kvaliteta lijekova i ocjenu dokumentacije o kvalitetu lijeka (farmaceutsko- hemijsko- biološki-mikrobiološki).“

Amandman II.

U članu 2. dosadašnja tačka 33) koja postaje tačka 34) mijenja se i glasi: „OVLAŠTENA LABORATORIJA“ je laboratorija angažirana od Agencije za lijekove i medicinska sredstva Bosne i Hercegovine u skladu s ovim zakonom za poslove specifičnih analiza, a koja se nalazi u mreži Službenih kontrolnih laboratorija za lijekove (OMCL Official Medicine Control Laboratories), ili laboratorija ovlaštena od Agencije za lijekove i medicinska sredstva Bosne i Hercegovine za poslove ispitivanja lijekova u toku procesa razvoja i/ili proizvodnje lijeka a prije podnošenja zahtjeva za proizvodnju ili promet lijeka ili laboratorija ovlaštena, odnosno priznata od Agencije za lijekove i medicinska sredstva Bosne i Hercegovine za poslove kontrole kvaliteta svake serije proizvedenog, odnosno uvezenog lijeka.“

Postojeća tačka 34. postaje 35. a ostale tačke ovog člana od 35. do 56. mijenjaju redoslijed i postaju tačke od 35. do 57.

Amandman III.

U članu 9. stav (2) iza riječi „sredstva“ briše se interpunkcijski znak i riječi: „ili poslove kontrole lijekova“ a preostali tekst ostaje isti.

Amandman IV.

U članu 17. stav (5) iza riječi: „najmanje pet godina“ stavlja se tačka a preostali dio teksta briše se.

Amandman V.

U članu 58. stav (5) tačka 1) mijenja se i glasi:
„Da ima osiguran odgovarajući prostor, opremu i kadar za proizvodnju, ispitivanje i kontrolu kvaliteta u skladu s obimom i zahtjevima proizvodnog postupka ili potpisane odgovarajuće ugovore kojima dijelove proizvodnog procesa i analize povjerava trećoj strani, te uslove za skladištenje i otpremu lijekova.“

U stavu (9) iza riječi „nadzora“ dodaje se tekst: „te uslove za ugovorenu proizvodnju i kontrolu“ a ostali dio teksta ostaje nepromijenjen.

Amandman VI.

U članu 65. stav (1) tačka 2) mijenja se i glasi: „imati zaključen ugovor s laboratorijom za lijekove, u skladu s odredbama člana 79. ovog zakona.“

Amandman VII.

Član 79. mijenja se i glasi:

Vrste kontrola kvaliteta lijekova

(1) Kontrola kvaliteta lijekova koju obavlja Kontrolna laboratorija Agencije je:

- 1) Redovna kontrola kvaliteta svih lijekova koji su u prometu u BiH i koja se obavlja najmanje jednom u pet godina;
 - 2) Kontrola kvaliteta prve serije lijeka prije stavljanja u promet i prilikom obnove i varijacija koje zahtijevaju kontrole kvaliteta;
 - 3) Kontrola kvaliteta svake serije proizvedenog, odnosno uvezenog lijeka i supstance;
 - 4) Vanredna kontrola kvaliteta, odnosno kontrola kvaliteta lijeka koja se provodi na zahtjev Agencije u toku pribavljanja dozvole za stavljanje lijeka u promet ili nakon njenog pribavljanja;
 - 5) Posebna kontrola kvaliteta, odnosno kontrola kvaliteta svake serije rizičnih i drugih specifičnih kategorija lijekova.
- (2) Izuzetno od stava (1) ovog člana, kontrolu kvaliteta lijeka iz stava (1) tačka 3) može provesti laboratorija ovlaštena, odnosno priznata za takve kontrole od Agencije za lijekove i medicinska sredstva Bosne i Hercegovine.
- (3) U slučaju kada se kontrola kvaliteta lijeka predviđena stavom (1) tačkom 3) ovog člana provodi od Kontrolne laboratorije Agencije, proizvođač/uvoznik dužan je prije stavljanja u promet dostaviti Agenciji uzorak, a rok za provođenje takve kontrole je 30 dana.
- (4) U slučaju kada kontrolu kvaliteta lijeka predviđenu stavom (1) tačkom 3) ovog člana provodi ovlaštena, odnosno priznata laboratorija, proizvođač/uvoznik je dužan prije stavljanja u promet dostaviti Agenciji uzorak i nalaz izvršene kontrole.
- (5) Na prijedlog direktora Agencije, Stručno vijeće detaljno propisuje način i obim provođenja kontrole kvaliteta iz stava (1), pripremljene od Kontrolne laboratorije Agencije.

Amandman VIII.

U članu 140. stav (10) u posljednjoj rečenici dio teksta nakon riječi „otpremnu“ mijenja se i glasi: „u visini iznosa šestomjesečne plaće. Visina pomenute otpremnine povećava se na 12 mjeseci kod državnih službenika koji imaju najmanje 15 godina radnog staža.“

Ad . 3, 4. i 5.

U predloženom tekstu usvojeni su:

- Zakon o izmjenama i dopunama Zakona o jedinstvenom matičnom broju,
- Zakon o izmjenama i dopunama Zakona o ličnoj karti državljana i
- Zakon o izmjenama i dopunama Zakona o prebivalištu i boravištu državljana BiH.

Ad. 6.

Zakon o izmjenama i dopunama Zakona o krivičnom postupku BiH usvojen je s amandmanima koje je usvojila nadležna komisija, kako slijedi:

Amandman I.

Član 1. briše se.

Amandman II.

U članu 3. riječ: „svaki“ briše se.

Amandman III.

U članu 8. stav (3) briše se.

Dosadašnji st. (5) i (6) postaju st.(6) i (7).

Amandman IV.

U članu 11. stav (2) u novoj tački g) iza riječi: „u skladu s članom 197. dodaju se riječi: „i o oduzimanju imovinske koristi pribavljene krivičnim djelom u skladu s članom 392.“

Amandman V.

Član 14. stav (2) mijenja se i glasi:

„U članu 47. stav (3) riječi "branilac osumnjičenog, odnosno optuženog ima" zamjenjuju se riječima: " osumnjičeni, optuženi, odnosno branilac imaju“.

Amandman VI.

U članu 24. u prvom redu, iza riječi: „i ako to učini“ dodaju se riječi: „u prisustvu branioca“.

Amandman VII.

Član 29. mijenja se i glasi:

„Ako prepoznavanje nije moguće u skladu sa stavom (3) ovog člana, prepoznavanje će se izvršiti na osnovu prepoznavanja fotografija tog lica ili predmeta postavljenih među fotografijama svjedoku nepoznatih lica ili predmeta iste vrste.“

Amandman VIII.

U članu 38. stav (4) iza riječi: „ako se“ dodaju se riječi : „osumnjičeni ili“.

Amandman IX.

U članu 39. stav (2) mijenja se i glasi:

„U članu 132. stav (1) tačka d) mijenja se i glasi: „ u vanrednim okolnostima, ako se radi o krivičnom djelu za koje se može izreći kazna zatvora deset godina ili teža kazna a koje je posebno teško s obzirom na način izvršenja ili posljedice krivičnog djela, ako bi puštanje na slobodu rezultiralo stvarnom prijetnjom narušavanja javnog reda.“

Amandman X.

U članu 44. stav (8) riječ „vijeće“ briše se.

Amandman XI.

U članu 66. stav (1) u tački d) iza riječi: „ za imovinskopravni zahtjev“ dodaju se riječi: „ i oduzimanje imovinske koristi pribavljene krivičnim djelom.“

Amandman XII.

U članu 67. stav (6) u tački a) iza riječi:“ za imovinskopravni zahtjev“ dodaju se zarez i riječi: „ oduzimanje imovinske koristi pribavljene krivičnim djelom.“

Amandman XIII.

U članu 73. u trećem redu prije riječi: „zahtjev“ dodaje se riječ “opravdan“, a na kraju teksta brišu se navodnici i dodaje nova rečenica koja glasi: „ O opravdanosti zahtjeva odlučuje sudija, odnosno predsjednik vijeća.“

Amandman XIV.

Član 103. Prijedloga zakona briše se.

Amandman XV.

Član 110. briše se.

Ad. 7.

Zakon o Fiskalnom vijeću BiH usvojen je sa sljedećim amandmanima:

Amandman I.

U članu 3. dodaje se stav (5) koji glasi:

„(5) Za svoj rad članovi Fiskalnog vijeća ne primaju posebnu naknadu“.

Amandman II.

U članu 11. dodaje se novi stav (4) koji glasi:

„(4) Budžet Fiskalnog vijeća podložan je reviziji generalnog revizora institucija BiH“.

Ad. 8.

Zakon o plaćama i naknadama u institucijama BiH Predstavnički dom usvojio je s amandmanima kako slijedi:

Amandman I.

U članu 1. (Predmet) stav (1) na kraju rečenice stavlja se zarez i dodaje tekst koji glasi:“ izuzev plaća i naknada poslanika i delegata u Parlamentarnoj skupštini BiH, sudija, tužilaca i određenih kategorija stručnog osoblja u pravosudnim institucijama koje se uređuju posebnim zakonom“.

Amandman II.

POGLAVLJE I - USTAVNI SUD I PRAVOSUĐE, sa članovima 8. i 9. briše se.

Poglavlja II. do IX. u drugom dijelu Prijedloga zakona postaju poglavlja I. do VIII.

Članovi 10. do 65. Prijedloga zakona postaju članovi 8. do 63.

Amandman III.

Član 10. Prijedloga zakona mijenja se i glasi:

(1)

Platni razred	Radno mjesto	Koeficijent
A1	Sekretar doma u Parlamentarnoj skupštini BiH i sekretar Zajedničke službe PSBiH	6,50
A2	Savjetnik predsjedavajućeg i zamjenika predsjedavajućeg doma PSBiH	4,50

Amandman IV.

Član 11. Prijedloga zakona briše se.

Shodno amandmanima na čl. 10. i 11. Prijedloga zakona, u cijelom Zakonu briše se tekst koji se odnosi na poslanike i delegate, što će biti učinjeno prilikom motehničke obrade Zakona.

Amandman V.

Član 12. mijenja se i glasi:

Platni razred	Radno mjesto	Koeficijenti						
		nulti	1	2	3	4	5	6
B1	Stručni saradnik	2,10	2,17	2,20	2,25	2,28	2,33	2,37
B2	Viši stručni saradnik	2,35	2,40	2,45	2,50	2,53	2,60	2,70

B3	Stručni savjetnik	2,73	2,80	2,90	3,00	3,10	3,20	3,28
B4	Šef odjela	3,25	3,35	3,50	3,70	3,90	4,10	4,25
B5	Rukovodeći državni službenici (sekretar parlamentarne komisije, pomoćnik sekretara doma, pomoćnik sekretara Zajedničke službe, rukovodilac sektora, interni revizor)	4,20	4,35	4,50	4,65	4,80	4,95	5,05

Amandman VI.

U članu 13. mijenjaju se koeficijenti u sljedećim platnim razredima:

- Platni razred A2- „Predsjedavajući Vijeća ministara BiH“, koeficijent od „9,50“ mijenja se i glasi „9,00“;

- Platni razred A3- „Zamjenik predsjedavajućeg Vijeća ministara BiH“, koeficijent od „9,00“ mijenja se i glasi „8,80“;

-U platnom razredu A5, koeficijent „8,00“ mijenja se i glasi „8,20“.

Ostali koeficijenti u članu 13. ostaju isti.

Amandman VII.

U članu 13. Prijedloga zakona, u platnom razredu A6, iza direktora Direkcije za evropske integracije stavlja se zarez i dodaju riječi: „Direktor direkcije za ekonomsko planiranje“.

Amandman VIII.

1.U članu 13. platni razred A10 „Šef kabineta predsjedavajućeg Vijeća ministara BiH, šef kabineta člana Predsjedništva BiH, koeficijent 4,96, mijenja se i glasi: Platni razred A8 „Šef kabineta predsjedavajućeg Vijeća ministara BiH, šef kabineta člana Predsjedništva BiH koeficijent 6,1“.

2. Platni razredi A8 u Prijedlogu zakona postaje A9, platni razred A9 postaje platni razred A10, platni razred A10 postaje A11.

3. U istom članu platni razred A12 mijenja se i glasi: „Savjetnik predsjedavajućeg Vijeća ministara BiH, savjetnik člana Predsjedništva BiH, koeficijent 4,50 (umjesto 4,08)“.

Amandman IX.

U članu 14. platni razredi B1, B2, B3, B4 i B6 i pripadajući koeficijenti usklađuju se s platnim razredima i koeficijentima zaposlenih na istim ili sličnim pozicijama iz člana 12. ovog zakona. Također, u platnom razredu B4 dodaju se riječi „šef grupe u UIO“.

U istom članu, u platnom razredu B5, iza riječi „sekretar upravne organizacije“ dodaju se riječi: „rukovodilac osnovne organizacione jedinice Predsjedništva BiH, šef odsjeka u UIO“, analogno članu 25. ovog zakona, pod B5.

U istom članu, u platnom razredu B8, brišu se riječi: „Generalni sekretar Predsjedništva BiH“, dodaje se novi platni razred B9 s nazivom radnog mjesta: „Generalni sekretar Predsjedništva BiH i koeficijentom 6,50“.

Amandman X.

U članu 22. stav (1) tačka a) postojeći broj: „30%“ mijenja se i glasi: „35%“.

Amandman XI.

U članu 24., u tabelarnom prikazu, vrše se izmjene u sljedećim platnim razredima:

- Spajaju se platni razredi A1 i A2, a postojeći koeficijenti smanjuju se i iznose 8,40.

Ovom izmjenom vrši se pomjeranje platnih razreda kojih sada treba biti ukupno osam.

Amandman XII.

U članu 25., platni razredi B1, B2, B3, B4 i B6 i pripadajući koeficijenti usklađuju se s platnim razredima i koeficijentima zaposlenih na istim ili sličnim pozicijama iz člana 12. ovog zakona.

Amandman XIII.

U članu 29. stav (1) tačka b) alineja 1) broj 30% zamjenjuje se brojem 40%, broj 25% zamjenjuje se brojem 30%.

Amandman XIV.

U članu 40. dodaje se stav (4), koji glasi:

„Vijeće ministara BiH dužno je jednom godišnje dostaviti spisak lica koja koriste prava iz stava (3) ovog člana Parlamentarnoj skupštini BiH.“

Amandman XV.

U članu 45. stav (2) iza riječi u zagradi „maćeha“ dodaju se riječi: „usvojjilac i hranilac“.

Amandman XVI.

U članu 48. stav (1) iza riječi: “ provedeno na radu“ stavlja se tačka, a preostali dio teksta briše se.

Amandman XVII.

U članu 62. stav (1) tačke b) i c) brišu se.

U istom članu u stavu (2) umjesto: „2011. godine“ treba da stoji: „2009. godine“.

Amandman XVIII.

U članu 63. (Prestanak važenja ranijih zakona i propisa), podtačka a) briše se, a podtačke b), c), d), e), f), g), h) i j) postaju podtačke a), b), c), d), e), f), g) i h).

Iza tačke h) dodaju se nove tačke „i) i j), koje glase:

„i) član 43. stav 4. Zakona o komunikacijama Bosne i Hercegovine („Službeni glasnik BiH“, br.33/02 i 31/03, j) čl. 50.,51., 52., 53., 54., i 55. Zakona o Obavještajno-sigurnosnoj agenciji Bosne i Hercegovine („Službeni glasnik BiH“, br.12/04).“

Dom je, na prijedlog nadležne komisije, usvojio i sljedeći zaključak:

Obavezuje se Vijeće ministara Bosne i Hercegovine da u roku od 60 dana izradi prijedlog zakona o plaćama i drugim naknadama u sudskim i tužilačkim institucijama na nivou Bosne i Hercegovine i dostavi ga u parlamentaranu proceduru.

Ad. 9.

Prijedlog zakona o izmjenama i dopunama Zakona o finansiranju političkih stranaka usvojen je u prvom čitanju.

Ad.10.

Usvojen je Izvještaj Zajedničke komisije oba doma o usaglašavanju teksta Zakona o izmjenama i dopunama Zakona o upotrebi i zaštiti naziva Bosne i Hercegovine.

Ad. 11.

Predstavnički dom je za generalnog revizora imenovao Milenka Šegu, a za zamjenike generalnog revizora imenovane su Božana Trninić i Munevera Baftić.

Ad.12.

Predstavnički dom usvojio je izvještaje o radu za 2007. godinu:

- a) Zajedničke komisije za odbranu i sigurnost,
- b) Zajedničke sigurnosno-obavještajne komisije za nadzor nad radom Obavještajno-sigurnosne agencije BiH,
- c) Zajedničke komisije za ljudska prava, prava djeteta, mlade, imigraciju, izbjeglice, azil i etiku,
- d) Zajedničke komisije za administrativne poslove,
- e) Zajedničke komisije za evropske integracije i

f) Zajedničke komisije za ekonomske reforme i razvoj.

Ad.13.

Predstavnički dom dao je saglasnost za ratifikaciju:

- a. Strazburškog sporazuma o međunarodnoj klasifikaciji patenata,
- b. Evropske konvencije o nezastarijevanju zločina protiv čovječnosti i ratnih zločina,
- c. Konvencije o zaštiti nematerijalne kulturne baštine (UNESCO).

S poštovanjem,

PREDSJEDAVAJUĆI
PREDSTAVNIČKOG DOMA
Niko Lozančić